

Nos a Skapa!

Nos a kaba di haña un susto formal! E tormento tropikal, Bret, a kohe rumbo pa nos islanan. Nos a prepará. Nos a piki tur kos den kurá. Nos a klaba zim di dak. Nos a yena bòter ku awa. Nos a baha antèna di televishon. Nos a kumpra bateria pa flèslait i radio. Nos a yena tanki di outo ku gasolin. Nos a koba roi pa desvia awa for di kas. Nos a prepará un lugá pa nos bestianan. Nos a keda ku oreá kasi di plak na radio pa tende e último informashonnan di e progreso di Bret. Nos a perde soño. I nos a skapa!

Un tempestat òf orkan ta kòrdami di un fakto importante: AMI no ta dirigí mi mes bida; MI no tin tur kos bou di kontrol. Mi por tin salú, puesto, fama, plaka. Ma den un instante, tur mi poseshonnan material por desaparese. I asta mi bida ta prekario i insigur!

Ningun di nos tabatin plan pa sinta den kas djasabra anochi, ku tur bentana será i di teip, anshá, wardando i skuchando radio te madrugá. Nos tur tabatin plan di hasi algu otro. Ma pasobra Dios todopoderoso a laga nos ta menasá pa un tiki mas bientu i yobida ku kustumber, plannan di nos tur a kambia.

Normal, nos ta biba komo si fuera nos no tin mester di Dios. Nos kier sa ku nos tin suficiente intelijensia i forsa pa solushoná kualke problema. Di berdat nos ta biba manera paganonan ku no sa nada di Dios.

Ma ora nos ta haña nos den e tempestatnan di bida, nos ta spanta, i e ora ei si nos ta kla pa pidi Dios pa yudansa. Ma una bes tur kos a normalisá nos ta bolbe lubidá i ni asta ta kòrda yama Dios danki. Nos no ta kòrda ku kada rosea ta un regalo di Dios, i ku E por kita esaki den un será di wowo.

Nos a skapa e biaha aki! Ma probabelmente hopi di nos ya kaba a lubidá ku kada sekòndu di nos bida ta dependé di Dios.

Ma no tur hende a skapa. Mesun dia ku Bret a bati na porta di nos isla, nos a kuminsá haña informashon konkreto di e daño ku e tormento tropikal a kousa: inundashon, bientu a bai ku dak, basta daño material, i (te asina leu ku nos sa) mas ku 70 morto na Venezuela so.

Riba e mesun dia ku nos a skapa e tormento tropikal, e isla di Guam a eksperensia un temblor pisá--di 8.1 riba e skala di Richter. Riba e mesun dia ku Dios a spar nos di gara di Bret, un tifon ku bientunan destruktivo di 185 kilometer pa ora (kasi 100 km mas destruktivo ku Bret) a bati Hapon i tuma bida di por lo menos 45 persona. I riba esei, e mesun dia un otro temblor a sagudí e pais haponés di nobo, i ekspertonan a advertí ku un otro ola di marea por bolbe aplastá e kosta di Hapon!

Dikon nos si a skapa, ma otronan nò? Ta pasobra nos ta mihó ku nan? Tin hende ku por pensa asina.

Beibel ta konta nos di dos evento tragiko ku a sosodé na Herusalèm den tempu di Hesus. Evento #1: Pilato a mata algun hende ku tabata adorá na Herusalèm. E di dos evento: un toren a kai, matando 18 persona. Algun hende a bisa ku Dios a kastigá e víktimanan pasobra nan tabata mal hende. Ma Hesus a enfatisá dos biaha: "Boso ta kere ku (nan) tabata mas pekadó ku e otro(nan) pasobra un kos asina a pasa nan? Mi ta bisa boso, nò; ma si boso no konbertí..boso tur lo peresé.." (Lukas 13:1-5). Dios no a mata nan pasobra nan tabata pió ku otronan.

Dios no a spar nos pasobra nos ta mihó ku otronan. Ta di e misericòrdia di Dios so ku Bret no a laga su lasternan di destrukshon i desgrasia riba nos islanan. Nos no por tuma e misericòrdia i grasia di Dios e biaha aki komo un garantia ku E lo bolbe spar nos den futuro.

Ma asta si Dios skapa nos di tur tormento tropikal i orkan den futuro, ta sigur ku kada un di nos tin ku pasa individualmente den e skual di mas formal di tur tempu. Esei lo sosodé ora bo tin ku para dilanti e mesun Dios todopoderoso i duna kuenta pa bo bida. Ta straño ku hopi hende a hasi mas preparashon pa Bret ku nan ta hasi pa e skual final ku lo seya nan destino eterno.

Pa prepará pa esei, bo tin ku konfia Kristo so pa bo salbashon eternu i bandoná piká. Manera e teksto di Beibel ta bisa, "Si boso no konbertí..boso tur lo peresé." I riba e dia ei, ningun di nos por skapa!